

Tuleo O Le MALUA PAPAPA

Tala mai le Kolisi Faafaifeau i Malua / News from Malua Theological College; Lomiga LII - Me 2025

TALOFA LAVA!

E muamua ona sii le viiga ma le faafetai i le Atua, o le Tapa'au i le lagi, ona o lana tausiga alofa i le soifua o lana Ekalesia. Ua malumaunu ai le fogatia, aua ua atoa alii seu ma o latou soaseu i Malua nei, i le puipuiga malu o aao agalelei o le Atua, aua le faataunuaina o le seugā lupe o manuia, a le Fono Tele o lenei tausaga. E ui lava i se tofā loloto ma se faautaga mamao, e le faataunuaina pe a na le ō gatasi ma le finagalo o le Silisili Ese. E tumau le viiga o le Atua e faavavau.



Susuga Rev Prof. Vaitusi Nofoaiga
Pule o le Kolisi

E faatalofa ma faafeiloai atu i le mamalu o le Ekalesia. Afifio le Laulau o le Fono Tele, Susū ai le Taitaifono, Sui Taitaifono, Failautusi Aoao, ma le Teutupe. Susū le saofaiga malu o le Laulau a le Komiti o Tamā o le Ekalesia, ma le Komiti Mamalu a Tamā o le Ekalesia, i Susuga i Faatonu ma Toeaina. Afifio le nofo-a-Komiti eseese, le mamalu o usufono tofia mai Aulotu, Pulega, ma Matagaluega, ae maise le

usugafono a le Mafutaga a Tina. Faafetai i le alofa o le Atua, aua o lea ua sopo mai lo outou soifua, i faigamalaga i le ea, i le vasa, ma le ala, ma ua to'a i Maluāpapa ō outou sã. Malō le folau.

O le Maluāpapa a le Kolisi Faafaifeau i Malua, i lenei Fono Tele, 2025, e faatauaina faapitoa ai le faamanatuina o le 150 tausaga o le Fono Tele a le Ekalesia (1875 – 2025).

E manatua ai pea le alofa tausī mai o le Atua i lana Ekalesia. O le a faailoa ai foi nisi o galuega ma polokalame taua sa feagai ma le Kolisi Faafaifeau mai le Fono Tele i le tausaga 2024, e oo mai i le Fono Tele o lenei tausaga, 2025.

O le tatalo, ia alofagia pea e le Atua, le faamoemoe o lana Ekalesia e ala i lana Fono Tele, aua le soalaupuleina o fuafuaga lelei uma, mo le atia'eina o le Galuega a le Atua i so o se tafa o le Ekalesia. A tatala le filiali'i, ia malutia pea e le alofa o le Atua le soifua o lana Ekalesia. Ia afifio i lagi e mamā, ae tapua'i atu Malua i le manuia.

Ia manuia tele le 150 tausaga o le Fono Tele!

Vaitusi Nofoaiga
PULE KOLISI MALUA

SILASILA I TOTONU

Talofa Lava! - Susuga Vaitusi Nofoaiga	1	International Conferences	8
Faamanatuina o le 150 Tausaga - Fono Tele	2	Tusiga Faiaoga	9-11
Tautai A'e ma Faifeau Faauuina	3	Faamasani Tausaga 3	9
Saafiafiga	4	Ripoti Kolisi	12
CWM Meeting ma Dr Anthony Rees	5	Aoga a le Fanau	13
Faauuga Faiaoga	6	Motu le Pa	14-17
Amatalia Galuega a le Kolisi	7	Faamavaega	18
Malua Bible School	7	Atina'e ma Vaaiga Eseese i le Kolisi	19
		150 Tausaga o le Fono Tele	20

FAAMANATUINA O LE 150 TAUSAGA O LE FONOTELE



E maualuga pea le viiga o le Atua ona o lona alofa ua aulia manuia mai e lana Ekalesia, EFKS, le 150 tausaga talu ona faavae lana Fono Tele i le tausaga 1875. Sa faatumulia le Iupeli i le sauniga mo le faamanatuina o lenei aso faapitoa o le Fono Tele a le Ekalesia.

O le Afioga i le Taitaifono o le Fono Tele, le Susuga i le Toeaina Faatonu ia Tunumoso Iosia sa taitai i le sauniga lotu. Sa fesoasoani i ai le Teutupe Aoao, le Susuga i le Faifeau ia Melepone Isara (FS) i le faitauina o le Tusi Paia; ma le Sui Taitaifono, le Susuga i le Faafeagaiga ia Esera A. Esera (FS) sa feagai ma talosaga. Na tolauluina e le Failautusi Aoao, le Susuga i le Faifeau Fomai ia Taipisia Leilua le oototoga o le tala faasolopito o le Fono Tele i le gagana Peretania, a o le aotelega o le talaaga o le Fono Tele o loo faamauina lea i le tusiga i le gagana Samoa, na saunia e le Susuga i le Alii Pule o le Kolisi, le Faifeau Polofesa ia Vaitusi Nofoaiga i le lomiga lona 4 o le *Samoa Journal of Theology*, 2025.

Na maualuga lava lenei faamoemoe i le afio mai o le Ao Mamalu o le Malo Samoa, le Afioga i le Tamaaiga, Tuimalealiifano Vaaletoa Sualauvi II ma le Masiofo, le Afioga i le Tamaitai Palemia, Fiamē Naomi Mataafa, ma nisi o sui mamalu o le faigamalo a Samoa. Na susū mai foi nisi taitai o Ekalesia i totonu o Samoa-Taitaifono o Ekalesia Soofaatasi, Peresetene o le Ekalesia Metotisi,

faapea uso-tu-ofe a le EFKS mai Amerika Samoa, le EFKAS, faapea taitai o Ekalesia mai Tuvalu, Tokelau, ma Kiripati, tainane le Taitaifono o Ekalesia Soofaatasi o le Pasefika. O i latou na malaga mamao mai e molimauina ma patipatia lenei aso faapitoa i le tala faasolopito o Samoa ma le EFKS.

O se lagona fiafia foi i lea aso ina ua mafai ona auai mai le Susuga i le Failautusi Aoao o le Faalapotopotoga o Galuega Faamisionare i le Lalolagi (FGFL, CWM), le Faifeau Fomai ia Jooseop Keum, ua saga matagofie ai le faailogaina o le 150 Tausaga o le Fono Tele. Na maua foi le avanoa e saunoa faamanuia ai Keum i taimi o faafiafiaga ma ia faaalua ai le agaga faafetai ona o le sootaga tāua a le FGFL ma le EFKS faapea le Kolisi. Na ia tauaaoina ai foi se meaalofo mo le Fono Tele. Faafetai le agalelei.

Na maea le sauniga lotu ona sosoo ai lea ma nisi o sauniga faapitoa i le malae i lumafale o le Fale Mafutaga. E aofia ai pesepesega ma faafiafiaga faapitoa na saunia e le Kolisi Faafaifeau i lalo o le taitaiga a le Alii Pule ia Nofoaiga. O nisi o faafiafiaga na taitaia e A'oa'o ma Faifeau sikolasipi mai Tuvalu, Tokelau, ma Kiribati. Na faafofoga foi le aofia i pesepesega faapitoa i tulaga masani o faafiafiaga, ae maise o oototoga o le tala faasolopito o le Fono Tele talu mai le tausaga e 1875. Na sosoo ai ma faaaloaloga masani faa-le-aganuu ma le tufatufaina o keke e 150 na saunia e le Mafutaga Aoao a Tinā o le EFKS. Na saunia foi e le Mafutaga le meaalofo tupe e \$100,000 mo le Fono Tele.

E talitonu na faafiafiaina uma i latou na molimauina lea aso faapitoa. E saga faafetaia ai pea le alofa o le Atua ona o lana tausiga i lana Ekalesia. Ia manuia tele le faailogaina o le 150 Tausaga o le Fono Tele, faapea le folauga a le EFKS i lenei tausaga ma iēluā.



TAUTAI A'E

O se tasi o vaega tupito o le Fono Tele i tausaga taitasi, o le sauniga faapitoa e aloa'ia ai le malōlō penisione o Susuga i Toeaina ma Faifeau ma o latou Faletua mai le galuega tausī nuu. O le Aso Lulu, 21 o Me na faataunuaina ai lea sauniga tāua, e faailoa ai le agaga faafetai a'e o le Ekalesia Aoa mo nisi o Tamā ma Tinā ua a'e i fanua le faatamasoaliiga. O lea sauniga faapitoa na taitaia lava e le Afioga i le Taitaifono o le laulau o le Fono Tele, le Susuga i le Toeaina Faatonu ia Tunumoso Iosia. Sa faafetaia ai e le Taitai o le sauniga le soifua auaina mo le Atua, ae ia fa'aauau pea ona galulue i le galuega a le Atua, e ala i lo latou fautua ma le lagolago.

LISI O TOEAINA MA FAIFEAU PENISIONE MALŌLŌ



Makerusa Porotesano FT & Faate'a Matagaluega Amerika



Paul Gray FT & Tualogomai Matagaluega Vitoria



Matelili Maifala Leaana FT & Moevasa Matagaluega Niusaelese Sisifo



Isaako Iose Patea FT & Tavai Matagaluega Niusaelese



Aufaga F. Mauaivao FT & Sina Matagaluega Laumua o Aotearoa



Tautua Aurelio FT Matagaluega Faleata



Isaako Viki FT & Pereise Matagaluega Malua



Faasavala Leilua FT & Lina Matagaluega Faasaleleaga



Eslera A. Eslera FS & Tamara Matagaluega Faasaleleaga



Tupe Auelua FS Matagaluega Amerika



Fuata'i Simanu FS & Tumua Matagaluega Falealili-Safata-Siumu



Kuatemane Ulutui FS & Falesau Matagaluega Laumua o Aotearoa



Sili Mo'a FS & Logola Matagaluega Kuiniselani Saute



Niuetsi Aupaau FS & Senetima Matagaluega Kuiniselani Saute



Faalenuu Tagataese FS & Henrietta Matagaluega Vaimauga

FAIFEAU FAAU'UINA

O suafa nei o i latou ua faauuina e fai ma Faifeau Samoa (FS) i lenei Fono Tele, 2025

Rev Asoiva & May Saofa'i
Rev Ata & Kuinimeli Lemana
Rev Collin & Aifala Faletoes
Rev David & Leah Mafua
Rev Fafoi & Tulaga Atonio
Rev Faamoana & Soonasiva Fuimaono
Rev Ioane & Lufi Samuelu
Rev Laau & Faalaniga Tanielu

Rev Limuaa & Kate Fue
Rev Mika & Taliilagi Te'o
Rev Oata & Tuafale Leiataua
Rev Paie & Lolatosi Legalo
Rev Paulo & Taufau Sepuloni
Rev Pelenato & Susana Liufau
Rev Peni & Florence Manila
Rev Vite & Ferite Kalepo

SAAFIAFIGA

Susuga i le Toeaina Faatonu, Nomeneta Simanu

A o feagai le Kolisi ma lana tuuaga umi i le tausaga ua tuana'i atu (2024), na valaau ai e le Atua se tasi o Tamā o le Kolisi ma le Ekalesia, le Susuga i le Toeaina Faatonu ia Nomeneta Simanu. O le Toeaina Faatonu ia Nomeneta Simanu sa soifua mai i le aso 6 o Ianuari i le tausaga e 1957. Sa ulufale mai o ia i le Kolisi Faafaifeau i Malua i le tausaga e 1981, ma sa faaiuina manuia lona taumafai i le tausaga e 1984. Na valaauina i la'ua ma le Faletua ia Taua e avea ma Faafeagaiga a le Ekalesia EFKS Safa'ato'a Uta i le aso 22 o Iulai,

tausaga e 1989, ma sa galulue ai lava i lea aulotu se'ia o'o ina valaau le Atua i le Tamā. Sa filifilia o ia i le tofiga, Toeaina o le Pulega a Lefaga ma Falease'ela i le tausaga e 2019. A o le tausaga e 2023 sa seei ma ai o ia e avea ma Toeaina Faatonu o le Matagaluega A'ana. Sa tauaveina lava ia tofiga e le Toeaina seia o'o ina valaauina e lona Matai i le aso 5 o Tesema, 2024, ma ua atoa ai le 35 tausaga o le lā auunaga i le galuega a le Atua. Tautai A'e Tamā, ua iloga lou sao tāua mo le Ekalesia ma ua faapaleina oe i le malo o le Atua i le ola faavavau.

**Afioga i le Tiakono, Alii Pule o le Atina'e, Tanealaepa Leanapapa Fausia Iafeta Setu.**

O le aso 26 o Mati o le nei tausaga na valaau ai le Atua i se tasi foi o Tamā ma paaga masani a le Laumua, le Afioga i le Alii Pule o le Atina'e a le Ekalesia, le Afioga i le Tiakono ia Tanealaepa Leanapapa Fausia Iafeta Setu. O le Susuga ia Setu poo Leanapapa, e pei ona lauiloa ai i le Kolisi, o se tasi o tamali'i iloga o le atunu'u i lona tomai i tulaga tau faatoaga ma lafu manu, ma sa tele foi ni tausaga na galue ai i le Matagaluega o Faatoaga ma Faigafaiava a le Malo o Samoa a o le'i avea ma Pule o le Atina'e i le tausaga e 2017. Ma na amata ai le mafutaga mafana ma le vāvā lalata

ma le Kolisi. Molimauiina le telē o le sao o lenei Tamā e ala i lona fesoasoani i auala eseese i faamoemoega o le Kolisi, ae a manaoga a le aiga Faiaoga ma A'oa'o. O se tasi o alo o Leanapapa o loo galue nei i le galuega Faafaifeau i le Ekalesia EFKS i Blenheim (Matagaluega Niu Sila i Saute), le Susuga i le Faletua ia Rita ma le Susuga i le Faafeagaiga ia Peniamina Faalave.

E ui i faanoanoaga ona o mafutaga ua motusia e le oti, o la Keriso, "Amuia e faanoanoa, aua e faamafanafanaina i latou." O alofaaga molipo foi a le Kolisi mo le Faletua ia Joyita ma le nofoaalo. O upu a Paulo i lana tusi ia Filipi, "Auā o lo'u ola ua iā Keriso lea; a o lo'u oti o lo'u manuia lea."



COUNCIL for WORLD MISSION (CWM) MEETING



E pei ona folasia e le Failautusi Aoao o le Faalapotopotoga o Galuega Faamisionare i le Lalolagi (FGFL, poo le *Council for World Mission*), ia Rev Dr Jooseop Keum, i lana folasaga i le faamanatuina o le 150 tausaga o le Fono Tele i lenei tausaga, “o le EFKS o se faataitaiga lelei lea o le galulue faatasi i le galuega faamisionare”. E faapena foi se faamoemoe na talimalo ai le Kolisi ia Ianuari 19-23 o le tausaga nei, i le fonotaga a le FGFL mo ana pa’aga i le Pasefika (*CWM Pacific Members Mission Forum*). Sa faapea ona auai mai ai sui o Ekalesia Kerisiano ese’ese o le Pasefika o loo auai i le faamalu o le FGFL. O le manulauti o le fonotaga o le “*Transforming Mission*”, ma sa amata lava i le faigalotu na taitaiina e le Susuga i le Pule o le Kolisi, le Faifeau Polofesa ia Vaitusi Nofoaiga, soso’o ai ma le



saunoaga faafeiloai ma le faamanuia a le Afioga i le Taitaifono o le Fono Tele, le Toeaina Faatonu ia Tunumoso Iosia mo lenei fonotaga. O le saunoaga autu na feagai lea ma le Tamaitai Faifeau Fomai ia Seforosa Carroll mai le Iunivesete o Charles Sturt i Ausetalia. Sa faapea foi ona auai ai nisi o Tamā ma Tinā o le Ekalesia e moli-mauina lea faamoemoe tāua, faapea ai ma le Sui Failautusi Aoao o le FGFL.

Sa faapea foi ona saunia ai ni a’oa’oga faaletusipaia (*Bible study*) e Faiaoga o le Kolisi mo lea fonotaga, o le Susuga i le Faifeau Fomai ia Alesana Palaamo ma lana pepa ua faaulutalaina o le “*Mark 14:1-9; Jesus’ Anointing by an Unnamed Woman Demonstrates Transforming Power*”. Faapea ma le Susuga i le Faifeau Fomai Faiaoga ia Brian Kolia ma lana pepa ua faaulutalaina: “*Rise to Life: Together in*

Transformation”. Na faaiu le fonotaga i se vaaiga aoao tetele i manatu tāua na mafai ona lagaina i le fonotaga, na saunia e le Susuga i le Sui Pule, le Susuga i le Faifeau Fomai Faiaoga ia Arthur Wulf, ma le Susuga i le Faifeau Fomai Faiaoga ia Visesio Saga. Sa faia ai foi ma se fonotaga faapitoa mo Tinā, sa auai ai Faletua o Faiaoga ma Faletua o le Kolisi. Na maea manuia le fonotaga. I le faaiu ai o le fonotaga, na saunia ai e le Ekalesia ni meaalofa mo sui auai taitasi o le fonotaga, ma momoli ai le faafetai ona o le auai mai, ma sa fofogaina e le Failautusi Aoao, le Susuga i le Faifeau Fomai ia Taipisia Leilua. E momoli ai le faafetai i le Ekalesia, i le laulau o le Fono Tele faapea Tamā o le Ekalesia ma le Ekalesia Aoao, mo le lagolago ma le nofo tatalo, ua i’u manuia ai lenei fonotaga taua. Ia manuia tele le faamanatuina o le 150 tausaga o le Fono Tele.



REV DR ANTHONY REES



O le aso 3-4 Aperila, 2025, na asiasi mai ai i le Kolisi le Susuga i le Alii Polofesa Lagolago o le Feagaiga Tuai, o Anthony Rees, mai le United Theological College, i Sini Ausetalia. Na tauaveina ai e Rees nisi o vasega a A’oa’o, ae maise o le fesootaiga o le Feagaiga Tuai ma nisi o mea o loo tutupu i lenei vaitau, e pei o le suiga o le tau (*climate change*). Na faatalanoaina foi e le Susuga ia Rees le mataupu o le Histories of Israel (tala faasolopito o Isaraelu), ma se faamamafa i le vaega o le Tusi Paia o le Torah. Na maua foi le

avanoa e talanoa ai i A’oa’o ma Faifeau sikolasipi o le polokalame o le Masters, e fautua ai i le faatinoina o tusiga, ae maise o nisi fesoasoani tāua ina ia faaleleia atili ai le faamoemoe.

Na momoli le faafetai tele a le Susuga i le Alii Pule, le Faifeau Polofesa ia Vaitusi Nofoaiga, i le Susuga ia Rees ona o lona sao tāua ma le faaavanoaina o lona taimi e fesoasoani ai i A’oa’o ma Faifeau sikolasipi. Na momoli mai foi le faafetai tele a le Susuga ia Rees i le agalelei ma le talimalo a le Kolisi, faatasi ma faamanuiaga mo le Kolisi ma le Ekalesia.

TUSI MO LE SUEGA ULUFALE 2025

FEAGAIGA TUAI: Teuteronome
FEAGAIGA FOU: Mareko

FAAUUGA FAIAOGA

Faailoga taualoa o le Fomai o le Tofa Manino (PhD).

O le Aso Lulu, 11 Tesema, 2024, na faataunuuna ai le faamoemoe o le Susuga i le Faiaoga Fomai ia Mariota Jonathan Seiuli i le faailoga taualoa o le Fomai o le Tofa Manino (*Doctor of Philosophy*) mai le Iunivesete o Otago i Niu Sila, ina ua faaiuina ma le manuia lona taumafai mo lea faailoga maualuga. O supervisors sa feagai ma lenei faamoemoe o le Susuga i le Alii Polofesa ia Paul Trebilco (Feagaiga Fou) ma le Polofesa ia David Tombs (Mataupu Silisili & Mataupu Lautele). O le faaulutalaina o suesuega e faapea: *“Re-Reading Romans 13:1-7 and Other New Testament Texts from*

the Perspective of Law and the Contextual Tax Issue in Samoa (2017-2022).”


O le Susuga ia Mariota e mai le EFKS Hamilton, Pulega a Waikato, Matagaluega a Manukau i Aukilani i Saute, o loo galue ai le Susuga i le Toeaina Faatonu ia Anatu Reupena ma le Faletua ia Mataina. O loo galue nei le Susuga ia Mariota i le Matagaluega o le Feagaiga Fou i le Kolisi Faafaifeau i Malua. E faaleoina ai le agaga faafetai o le Faiaoga i le Susuga i le Alii Pule o le Kolisi, le Faifeau Polofesa ia Vaitusi Nofoaiga ma le Kolisi, tainane le tapuaiga a Tamā o le Ekalesia, le Komiti o Malua ma le Ekalesia Aoao, a o Ekalesia uma foi i Samoa, Niu Sila, ma Ausetalia sa fesoasoani malosi i lona taumafai. Malo le tau!

**Faailoga Maualuga o le Master of Theology.**

E toatolu Susuga i Faiaoga ua faamanuiaina le taumafai i le faailoga maualuga o le Master of Theology ma o loo galulue nei i le tatou Kolisi Faafaifeau. O le Susuga ia Fraser Tauaivale ma le Faletua ia Julie sa faauuina mai le Kolisi Faafaifeau i Malua, 2024, i le faailoga o le Master of Theology (Distinction). Sa sue mai Tauaivale mai le EFKS Agape i Garden Grove, o loo galulue ai le Susuga i le Faafeagaiga ia Filo Tauaivale ma le Faletua ia Feagai, i le Pulega a Saute mai le Matagaluega a Amerika. O loo galue nei Tauaivale i le Matagaluega o le Tala Faasolopito o le Ekalesia. O le ulutala o lana tusiga: *“Viewing the London Missionary Society (LMS) Land Acquisitions in Samoa From the Samoan Land Tenure Perspectives of Igagatō, Matū Palapala, and Pule, 1830-1930.”*



O le Susuga i le Faiaoga ia Tafatolu Bentley ma le Faletua ia Emelia ma le fanau, ua faaiuina le taumafai mai le University of Divinity i Melebone, Ausetalia, ma le faailoga o le Master of Theology. O lea faailoga sa mafai ona a'oa'oina i le Trinity College, o se tasi o Kolisi Faafaifeau i lalo o le faamalumaluga a le University of Divinity. Sa faatinoina le a'oga i luga o upega tafa'ilagi (*on-line learning*) ona sa aumau lava



Bentley i Brisbane, ona o tulaga o galuega, aemaise le tautuaina o lana aulotu, Logan City EFKS, i le ta'ita'iga a le Susuga i le Faifeau Toeaina ia Ionatana Faaiuasao ma le Faletua ia Alapeta, mai le Pulega a Logan, Matagaluega Kuiniselani i Saute. O le mamafa o le polokalame sa faatino i le tauaveina o mataupu eseese, ae faaiu i le suesuega e faatatau i le: *“Exploring Discipleship in Matthew 28:16-20 from a Biblical and Missiology perspective.”* O loo galue nei le Susuga ia Bentley i le Matagaluega o le Faiva Alofilima o le Mataupu Silisili.



O le Susuga i le Faiaoga ia Saleaula Reti ma le Faletua ia Moevasa ma le fanau na faau'uina i le faailoga maualuga o le Master of Theology (Distinction) mai le Kolisi Faafaifeau i Malua, i le tausaga, 2024. O Reti sa sue mai le EFKS i Manono Uta, o loo galulue ai le Susuga i le Faafeagaiga ia Napoleone Vaiaso ma le Faletua ia Sita, i le Pulega a Aiga i le Tai, a o le Matagaluega a A'ana. O loo galue foi o ia i le Matagaluega a le Faiva Alofilima o le Mataupu Silisili. O le ulutala o ana suesuega: *“Towards Early Intervention programs for Christian Education of the EFKS/CCCS to reverse the trend of youth leaving the Church.”* Ia faamanuia le Atua i le soifua faaaogaina i totonu o le Kolisi auā le tapenaina o fanau talosia a le Ekalesia mo le galuega a le Atua.



AMATALIA GALUEGA A LE KOLISI

O le Aso Lulu, 5 Fepuari, 2025, na toe a'e mai ai le Kolisi ina ua maea le tuuaga umi o Tesema 2024 – Fepuari 2025. Na amata i le sauniga lotu na taitaiina e le Afioga i le Taitaifono o le Komiti a Malua, le Susuga i le Toeaina Faatonu ia Asotasi Gu Time (FT), ona sosoo ai lea ma le taumafataga na saunia e le Kolisi mo Tamā o le Ekalesia ma nisi o matua ma aiga na auai mai i lea aso. Na faafeiloai mai ai foi le Komiti i Susuga i A'oa'o ma Faifeau fou ma o latou aiga ua ofi mai mo le taimi muamua i le Kolisi i lenei tausaga, ae maise foi o Susuga i A'oa'o ua faai'uina a'oa'oga mai atunuu mamao ma Samoa nei, ma ua valaauina e galulue i lenei tausaga i le Kolisi. Na saunia ai e i latou nei ua

avea ma Faiaoga o le Kolisi nai mealofa mo le Komiti o Malua ma Faiaoga e faaalua ai lo latou agaga faafetai i le tapuaiga a le Ekalesia ma le Kolisi Faafaifeau i Malua.

O le Aso Tofi, aso 6 i le aso 8 o Fepuari, na amata ai galuega o le tapenaina o le lotoa atoa o le Kolisi, atoa ma ana atinae, e pei o le maumaga, togafai, le papovi, ma isi. O le vaiaso na sosoo ai, 10–14 Fepuari, na faatino ai polokalame o le Resitala ma le Orientation; ona amataina lea o vasega i le Aso Gafua, 17 Fepuari 2025. O le faafetai i le taitaiga a le Atua o loo sologa lelei galuega faasolo a le Kolisi mo lenei tausaga.

MASTER'S PROGRAM

O loo sologa manuia foi lenei polokalame tāua a le Kolisi, i le lona fa lenei o tausaga talu ona faavae mai. Ma o loo alualu lava i luma ma faaleleia atili lenei auunaga, e tali atu ai i manaoga o i latou o faaauuina le soifua saili i afioga paia a le Atua.

O lenei tausaga ua amatalia ai nisi o laasaga fou i le faatinoina o le polokalame, e pei ona tuu faatasia ai mataupu mo le vasega Faaiuso (BD program) ma le tausaga muamua o le Master Program, e pei ona fautuaina e le Matagaluega o Faailoga Tauloa a Samoa (SQA). Ua mafai foi ona faaoga le auunaga i vasega “on-line” (‘zoom’ poo le ‘moodle’ mode) mo i latou e lē o mafai ona auai mai i vasega i le Kolisi, ona o galuega faapea i latou mai atunuu i fafo. E fetuutuunai ai e le Faiaoga taimi talafeagai mo vasega, e fua i taimi

avanoa o le Faiaoga ma i latou o tauaveina mataupu. O le isi laasaga fou, ua mafai foi ona filifili le sui auai i le “full-time” poo le “part-time” option e faatino ai le faamoemoe. O ia taumafaiga uma ina ia siitia pea le auunaga ma ia fesoasoani atili i Faifeau ma A'oa'o a'oa'oga. E toa sefulu fitu (17) i latou i vaega uma e lua o le polokalame; sefulu fa (14) o loo feagai ma tusiga ma le faamoemoe e faauu i lenei tausaga, ma le toa tolu o loo tauaveina mataupu (two-year course, fulltime). I le toa sefulu fa o loo tusia pepa, e toa tolu (3) Faifeau sikolasipi mai le Ekalesia Kelisiano Tuvalu ma le toa lua (2) mai le Kiribati Uniting Church. O ata vaaia ia o le amanaiaina o le tatou polokalame e nisi o Ekalesia o le Pasefika. Ia viia le Atua ona o ia taumafaiga uma.

MALUA BIBLE SCHOOL & GRADUATION

O le amataga o le Aoga Tusi Paia a Malua sa faia ai se faalauiloa i le Kolisi o Maluafou, i le Aso Lua, 4 Fepuari, 2025. Sa amatamea le Pule o le Kolisi Faafaifeau / Aoga Tusi Paia a Malua, le Susuga i le Faifeau Polofesa Vaitusi Nofaiga i le sauniga amata. Ona sosoo ai lea ma saunoaga a Faiaoga o Matagaluega taitasi e faalauiloa mataupu o le ā a'oa'oina i lenei tausaga. O se avanoa foi sa faatino ai resitala mo vasega o le Kuata muamua mo vasega

i Apia. Sa auai atu foi Faiaoga i Savaii i aso 7–8 o Fepuari 2025, i Salelologa ma Samalaeulu e faalauiloa mataupu o le ā a'oa'oina, faatasi ma le resitala. Sa taitaiina e le Sui Pule, le Susuga i le Faifeau Fomai ia Arthur Wulf sauniga lotu mo ia faatasiga. A o le Susuga i le Toeaina ia Palemia Tauiliili sa saunia le faigalotu e tatala ai le toe amataina o le Aoga i Samalaeulu.



INTERNATIONAL CONFERENCES

Humanimal Virtual Conference 2.0



O le aso 6-7 Mati, 2025, na faia ai le fonotaga i luga o le upega tafa'ilagi (online conference) ua faaigoaina o le "Humanimal Virtual Conference 2.0." O se fonotaga na valaaulia ai le tele o tagata sutesue o le Tusi Paia i le lalolagi, ina ia tapena ai ni faitauga o le Tusi Paia o loo faamamafa ai le t̄ua o manu (animals), poo ni pepa foi o loo iloa ai le faaogaina

o gagana e fesootai ma manu i totonu o le Tusi Paia. I lea fonotaga, e lua saunoaga autu, ma o le saunoaga autu muamua na saunia e le tamaitai sutesue o le Tusi Paia, o Dr. Suzanna Millar, ae o le saunoaga autu lona lua na saunia e le Susuga i le Polofesa iloga o le Feagaiga Tuai, o David Carr, ma le Faifeau Fomai Faiaoga mai Malua ia Brian Kolia. Ua faaulutalaina le saunoaga autu a Carr ma Kolia, "Diverse Multi-species Lifeworlds, the Bible, and Stories We Tell About Our Relations."

7th Annual Religion & Ecology Summit: Sacred Waters of the World

O le aso 21-23 Aperila 2025, na faia ai le fonotaga i luga foi o le upega tafa'ilagi o le 7th Annual Religion & Ecology Summit: Sacred Waters of the World, na tapenaina e le California Institute of Integral Studies i Amerika. E pei ona faailoa i le igoa o le fonotaga, o loo faat̄ua i mafauauga le vai ma lona t̄ua faaleagaga mo tagata, ae maise mo tagat̄nuu moni (indigenous peoples) i soo se vaega o le lalolagi. Na valaaulia ai le Susuga i le Faifeau Fomai Faiaoga mai le Kolisi o Malua, ia Brian Kolia, e saunia se pepa mo se faatalatalanoaga ma nisi o tagata sutesue i le lalolagi, faapea i latou mai isi tapuai-

ga, e pei o le tapuaiga Iutaia (Judaism), Isalama (Islam), Buddhist, ma isi. Na saunia e Kolia le pepa ua faaulutalaina, "Native Waters not Sacred?: A Riverine Reading of 2 Kings 5:1-14" e faatauaina ai le vaai faa-tagata o vaitafe, e toe faitauina ai le tala ia Naamanu e pei ona faamauina i le 2 Tupu 5:1-14.

E momoli le faafetai tele i le Ekalesia Aoao ona o le nofo tatalo, ae maise o le tapuaiga a le Komiti o Tam̄a o le Ekalesia faapea le Ekalesia Aoao i ona tulaga faalupea. E le faagaloina foi le tapuaiga a le Susuga i le Alii Pule ma le Kolisi Faafaifeau, a o alo i ia fonotaga t̄ua.


CWM ZIMBABWE



I le ma'ea ai o le fonotaga a le FGFL i Malua mo ana pa'aga i le Pasefika, na valaau faapitoa ai e le Sui Failautusi Aoao, Dr Sudipta Singh, le Susuga i le Alii Pule, Polofesa Vaitusi Nofoaiga e auai atu mo le isi fonotaga a le FGFL, "Discernment and Radical Engagement (DARE)" na faia i Harare, Zimbabwe, Aferika, 27-30 Ianuari 2025. O le ulua'i fonotaga lea a le DARE i Aferika ma e toa 130 tagata sa auai. O le sini aut̄u: "Aftermath: Beyond Liberation."

O lo'o faatupula'ia pea le faiga-pa'aga a le EFKS, le Kolisi ma le FGFL i le galulue faatasi, ma avanoa

mo Faiaoga Malua faapea le Aufaigaluega ma Ta'ita'i o le Ekalesia Aoao e auai atu ai i nei fonotaga t̄ua. E momoli ai le faafetai tele i le Ekalesia i ona vaega faalupe, ona o le lagolago ma le tatalo, ua i'u manuia ai faiva sa feagai ma le Susuga i le Alii Pule o le Kolisi.




Malua Bible School Cont'd.

O le Aso 15 o Mati, 2025, sa faia ai le faauuga a le Aoga Tusi Paia. E tulaga ese lenei faamanuia ona o le ulua'i taimi lea ua faauuina ai ma sui o le Aoga Tusi Paia mai Aukilani, Niu Sila, talu ona amata lea vaega o le aoga i le tausaga 2022. O le Afioga i le Taitaifono o le Komiti o Malua, le Susuga i le Toeaina Faatonu ia Asotasi Gu Time sa ia taitaiina le sauniga i lea aso. E 87 i latou sa faamanuiaina mai l̄l̄a uma e fa o loo faatino ai le aoga—Apia, Salelologa, Samalaeulu, ma Aukilani. E 53 sa faauu i le Tusi Pasi i le Mataupu

Silisili (38 sui mai Aukilani/Manukau), ma le 44 sa faamanuiaina i le Tipiloma i le Mataupu Silisili. E aofia ai Faletua o A'oa'o i'u mai Malua, faapea le Faletua o le Faiaoga Malua, fa'atasi ai ma nisi o Faletua o Faifeau, A'oa'o fesoasoani faapea tagata lotu. Sa faauuina ai foi sui mai Ekalesia eseese, e pei o le Metotisi, Cornerstone Church, Worship Centre, Assembly of God, Penetekoso ma le Katoliko Roma. Ua faamalo le taupati, malo le tauivi, ae foi le viiga i le Atua.

TUSIGA FAIAOGA




O se tasi o matatia o le Fono Tele o lenei tausaga o le faalauiloina lea o le tusi a le Susuga i le Faifeau Fomai Faiaoga ia Brian Kolia. O lenei tusi, ua toe teuteuina ai le suesuega (*dissertation*) a le Susuga ia Kolia mo lona faailoga o le Fomai o le Tofa Manino (PhD). O le tusi ua faaulutalaina, *Carrying Qoheleth's Maota (House): An Australian Diasporic Reading*, sa tuu faatasia ma faalauiloina i lalo o le faamalumaluga a le *International Voices in Biblical Studies, Society of Biblical Literature Press*, o se faalapopotoga suesue o le Tusi Paia e faamautu i Atlanta Georgia, USA. E pei ona ta'ua e le Susuga ia Kolia i lana faalauiloa i le Fono Tele, o le faamoemoe o le tusi, o se toe faatatauina lea o le tusi a Failauga mai se vaaiga faatiasipora (*diasporic reading*). Na momoli le agaga faafetai o le Su-

suga ia Kolia i Tamā o le Ekalesia, tainane o le loaloa o le EFKS, faapea le Susuga i le Alii Pule, ma le Kolisi Faafaifeau i Malua, mo le tapuaiga ma fesoasoani ua a'e manuia ai faiva o lenei galuega sa feagai ai. Sa faaalua foi le agaga faafetai o le Susuga ia Kolia i ona aiga, ae maise le faletua ia Tanaria ma le atalii ia Elichai.

Na maua foi le avanoa o le Susuga i le Faifeau Fomai Faiaoga ia Samasoni Moleli Alama, o se tasi o soa-faatonu (co-editors) ma le Susuga i le Alii Pule, Faifeau Polofesa Vaitusi Nofoaiga, e faalauiloa ai le lomiga lona fa (Volume 4) o le *Samoa Journal of Theology (SJT)*. Mo le faamatuina o le 150 Tausaga o le Fono Tele i lenei tausaga, o loo aofia ai i lenei lomiga se tala ootooto o le Tala Faasolopito o le Fono Tele talu mai le tausaga 1875. O lenei ootootoga sa tusia e le Susuga i le Alii Pule i le gagana Samoa. O nisi o matatia o loo i totonu o lenei tala, e aofia ai se sootaga vava lalata o le Fono Tele ma le Malo Tutoatasi o Samoa. E pei foi o tausaga ua ma-

vae, o le lomiga lona 4 o le *SJT* o loo faasalalauina ai tusiga eseese a nisi o Faiaoga i mataupu o loo ave i ai le faamamafa o suesuega o lenei talutalufou. O nisi o mataupu e aofia ai mataupu faavaomalo, o suiga o le tau, ma fefaatauaiga o fanua i aso ua mavae. O loo faapea foi ona faalauiloa le lomiga lona sefulu ma le lua (Volume 12) o le *Tafatolu* journal, o suesuega a le Alii Pule ma Faiaoga o le Kolisi o loo tusia i le tatou lava gagana Samoa. O ia tusiga sa faasoa ai ma le paia i le Afaigaluega ma Tamā o le Ekalesia i taimi o le Mafutaga Faafouina i le tausaga ua mavae atu. E lē faaitiitia ai le agaga faafetai i Tamā o le Komiti a Malua, faapea le tapuaiga a le loaloa o le Ekalesia. O la outou tapuaiga o loo maua ai le malosi e faatino ai le valaauina i totonu o le Kolisi.



POLOKALAME FAAMASANI TAUSAGA 3

E tulaga maoa'e lenei tausaga i tapenaga a le Kolisi mo lana Polokalame Faamasani. Ua talia ai e le Komiti o Malua mo le uluai taimi, le faataunuina o le Galuega Faamasani mo le Vasega Lagolago (Tausaga 3) i atunuu mamao. O se fuafuaga na faamaite e le Matagaluega o le Faiva Alofilima o le Mataupu Silisili ina ia silafia ma malamalama A'oa'o ma Faletua i le eseesega o siosiomaga o loo faatino ai le galuega i Samoa ma atunuu i fafo. O le amataga o le masina o Oketopa ua fuafua e autovaa atu ai A'oa'o ma Faletua mo Aukilani i Niu Sila; seia oo ina faamaeaina le polokalame mo vaiaso e lua ona toe talia mai ai lea i Samoa, i le iuga o lea lava masina. E lua Matagaluega a Aukilani ua sii aao e galulue soosoo tauau ai ma le Kolisi i le faatautaiga o le polokalame, o le Matagaluega a Aukilani o loo taitaia e le Susuga i le

Toeaina Faatonu ia Pouniu Faamausili ma le Faletua ia Aniva, ma le Matagaluega a Manukau i le taitaiga a le Susuga i le Toeaina Faatonu ia Anatu Reupena ma le Faletua ia Mataina. O le Galuega Faamasani o le polokalame faaauau lea a le Kolisi mai le tele o tausaga ua mavae, mo A'oa'o ma Faletua o le Tausaga Tolu e molimauina ma matauina ai le faatinoina e Faafegaiga Tausinuu o galuega faafaifeau i aulotu taitasi. O le faamoemoe ina ia tapenaina ai i latou mo le avea ai ma faifeau ma faletua e faatino le galuega i le lumanai. O se avanoa tāua foi e faamasani ma mulimulitai ai i le faatinoina o le galuega e pei ona valaauina ai le paia i le Afaigaluega a le Atua i nofoaga ma atunuu eseese. Ia tautai le Atua i lea faamoemoe tāua.



Ootootoga o le Tala Faasolopito o le 150 Tausaga (1875 - 2025) o le Fono Tele a le Ekalesia Faapotopotoga Kerisiano Samoa (EFKS).

Rev Prof Vaitusi Nofaiga

O le fa'amoemoe o lenei tusiga, o le fa'amatalaina lea o se tala ootooto o le tala fa'asolopito o le Fono Tele a le Ekalesia Fa'apotopotoga Kerisiano Samoa (EFKS) i le tatou lava Gagana. I lenei tusiga, o loo fa'ailoa mai ai le so'otaga ma le vāvā lalata a le Ekalesia ma le malo o Samoa. O loo ta'ua ai foi suafa o nisi o Tamā, o Fai-feau, ma Tiakono Samoa, sa avea ma Ta'ita'ifono o le Fono Tele i totonu o le 150 tausaga o le Fono Tele, talu mai le tausaga 1875.



Love for thy Neighbor from the Perspective of Paul in Romans 13:8-10 in Light of Political Strife within Samoa (2025)

Dr Mariota Seiuli

O le auga o lenei tusiga o se fa'atupu manatu fa'a Tusi Paia, e fesoasoani ai i le tulaga o i ai nei le mālō o Samoa.



Rizpah's Ifoga in 2 Sam 21:1-14: A Voiceless Plea for Forgiveness

Rev Dr Samasoni Moleli

O lenei pepa e fa'ataui i le sao tāua o tina ma tamaitai i le galuega fa'amagalo a le Ekalesia.



Traditional Oratory and its Impact on Christian Preaching.

Rev Dr Reupena Maulolo

O se fa'asoa e fa'ataui i le tāua o le gagana e fa'aogā i lauga e faigofie ona malamalama ai le fanau talavou.



"They are but Animals": De-centering anthropocentric attitudes in Ecclesiastes.

Rev Dr Brian Fiu Kolia

O se tasi lea o faitauga fou ua i ai nei i le Tusi Paia e fa'atāua ai nisi mea o le foafoaga e ese mai ai i le tagata. O se faitauga e toe faitau ai le tusi o Failauga.



Storms of Empire: Paul's Journey to Rome in Acts as a Narrative of Imperial Power, Divine Purpose, and Ecological Vulnerability.

Rev Dr Fatilua Fatilua

O lenei tusiga o se vaaiga i le malaga faamisionare a Paulo e pei ona fa'amaui i le tusi o Galuega lea o loo milo fa'atasi ai ma isi tafa tāua e pei o le malosiaga fa'akolone, o le fa'amoemoe o le Atua ma aafiaga o le siosiomaga.



Towards a Samoan Theological Interpretation of the Holy Spirit in the Life and Mission of the EFKS.

Hobert Sasa

O lenei tusiga o le toe fa'aolala o le Agaga Paia i le galuega fa'amisionare a le Ekalesia, e amata mai i tagata taitoatasi seia oo i le fa'apotopotoga o tagata.



Igagatō: A Permanent Home for the Gospel in Samoa: The Indigenous Value of Land Granted to the London Missionary Society (LMS) in Samoa

Fraser Tauaivale

O lenei taumafaiga ua fa'atalanoa ai le mafuaaga tonu na ofo ai e tagata Samoa o latou fanua mo le lotu fa'ameaalofa ae fa'aogā ai le upu "Igagatō."



The Significance of Early Intervention Programs in the development of Youth in the Church: The Key Roles of Ministers, Parents, and the Church in the fight against Youth decline in the EFKS/CCCS Church in Samoa

Saleaula Reti

O le fa'asoa a lenei suesuega e fa'ataui i le tāua o tupulaga aemaise o tiute o le lotu, mātua, ma le Faifeau i le tapu'eina o tupulaga e tali atu ai i le fa'afitauli o le ose o tupulaga ma le lotu.



Crowds as Jesus' disciples: A Sociorhetorical reading of Matthew 13:1-23

Rev Prof Vaitusi Nofaiga

I lenei tusiga o loo auiliili ai le uiga o le "motu o tagata" i le tusi o Mataio i se ata manino e fa'ailoa ai le fa'atāua o tagata uma i le finagalo o le Alii i le galuega fa'aso'o.

TAFATOLU - O TUSIGA FAA-MATAUPU SILISILI A MALUA



Tusiga ma faamatalaga pupu'u mo le lomiga o le Tafatolu 2025.

E pei ona masani mai ai i tusiga ua mavae, o tusiga nei ma ni faamatalaga pupu'u o le a mafai ona mauaina i le lomiga o le Tafatolu mo le Fono Tele 2025. O nei tusiga sa muamua ona fofogaina ai le Aufaigaluega i le Mafutaga Faafouina Faifeau, 2024, ma ua tuu faatasia mo le lomiga o le Tafatolu 2025.



Su'esu'ega i Feagaiga i le Feagaiga Tuai - Samasoni Moleli

O lenei pepa e faatatau i le mataupu i feagaiga (covenant) i totonu o le Feagaiga Tuai. O le faamoemoe autu o lenei pepa, e fia faamati'e feagaiga e ono na osia e le Atua ma ona tagata, ae maise o le foafoaga.



Pepa Fonotele 2024 - Faamanaina e le Agaga Paia e Atia'e le Ekalesia a Keriso - Visessio Saga

O le faamoemoe o lenei pepa, o le toe autala ma auilili atili le manulauti o le taiala o le Fono Tele 2024, auā se sao ia manuā o le soifua tautua ma le ola faitaulaga o tagata EFKS mo le Atua ma lana Talalelei.



Toe Timata/Matimati le Upega: O le Pogai o le Apoapoa'i a Paulo ia Korinito - Reupena Maulolo

O le auau o lenei pepa e faatāua ai le faaupuga o le "Toe timata/matimati le upega", e faamatala ai le pogai o le apoapoa'i a Paulo ia Korinito e pei ona faamauiina i le 1 Korinito 1:17.



O le Tafatolu ma Salamo: O se Vaaiga i le Tusi o Salamo/Seeing Psalms - Malutafa Faalili

O lenei suesuega, o le a faaoga ai se tasi o metotia po o auala e faauigaina ai Salamo e pei ona uunaia e se tasi o alii polofesa o le Feagaiga Tuai ia William Brown. E faatauina i lenei metotia le vaa i ata faatusa (metaphors/imageries) e manino mai ai le feau ma le faamoemoe o se Salamo, ae maise le taoto manino o le tafatolu o le sootaga o le tagata ma le Atua ma le foafoaga i le tele o nei pese.



O le Faaputugaoa: O se Vaaiga Faatalafaasolopito i le Faavaeina o Aulotu - Leuelu Setu

O le faamoemoe o lenei pepa, e fia togi se maa i le faaputugaoa a le Kolisi i lona Faletusi i tusi ma lomiga eseese, ae maise o Suesuega (researches) ma Tusiga (Theses) ua faamauiina ma teuina mo le faaogaina e alo ma fanau a le Ekalesia.



Uluuluāmatāfolau: O le Agaga Paia ma le Lotoifale o le Ekalesia. - Robert Sasa

O le sini autū o lenei taumafaiga, o se toe fafagu ma se toe fa'aolaolaina o le Mataupu Silisili e faatatau i le Agaga Paia, ma lona olaina i le olaga o aso uma. O le fa'amoemoe ina ia toe tapu'e le ola faatuatua, ma ia tatou saili atu pea i le Agaga o le Atua, a o feagai ai ma faafitauli i le lotoifale o le tagata faatuatua, ma le Ekalesia a Keriso.



Mataupu Silisili Fa'asiosiomaga: Fale Samoa (Eco-Theology: Fale Samoa Theology) - Tafatolu Tapaleao

O lenei pepa o le a taumafai ai e faatalanoaina le mataupu tau "Aso o gataaga"/ "Aso amu-lī" (eschatology), mai se vaaiga e faaautu faapea: O Le Vaai i Lo Tatou vā Faale siosiomaga, e faaogaina ai se mataupu silisili o le a fatuina mo lenei pepa, o le mataupu silisili fa'a-Fale Samoa (Fale Samoa Theology). O le faamoemoe, ia maua ai se faavae tāua e malamalama ai i lo tatou sootaga ma le siosiomaga, ae maise le foafoaga atoa.



Laau o le Sopoaga: EFKS Primary School Aoga Tulagalua - Clarke Stowers

O le faamoemoe o lenei pepa, o le ototoo o le sao o le Ekalesia EFKS i le soifua a'oa'oina o fanau a Samoa. O le a faaogaina ai se tasi o alagaupu a le atunuu, e faamatala ai le faigamala uumi a le Ekalesia, na sopo'ia fitā o le ala ina ia mautinoa le malu; ia mautinoa le ola; ia mautinoa le faaauauina o le Talalelei i Samoa ma atunuu o le Pasefika.



O le Mea Matuitui (i) Paulo: Ia Tu'ia ai i Tatou - Visessio Saga

O lenei pepa, o se taumafaiga e faauiga le faaupuga a Paulo, "sa tuuina mai ia te au le mea matuitui o le tino..." (2 Korinito 12, se vaega o le fuaiupu e 7), e pei ona saunoa ai le Aposetolo i lana tusi i le Au Kerisiano o loo i le Ekalesia i Korinito.



"Pe se a ea le uiga o na ma'a ia te outou?" O se Saililiga i se Mataupu Silisili o le Manatua. - Esera Esera

O lenei pepa ua faaulutalaina i se fesili o loo i le tusi o Iosua 4:6 "Pe se a ea le uiga o na maa ia te outou?" O lenei fesili o loo tu mati'e ai le taua o le manatua e Isaraelu o le galuega faaola a le Atua ia i latou. O le faamoemoe o lenei pepa o se taumafaiga e toe asia le mataupu silisili o le "manatua" (remembrance) i le Tusi Paia, faapea foi tu ma aga -i-fanua a Samoa.



O Taofiga Tau Le A'oa'oina (Learning Theory) - Fa'afetai Koria

O a'oa'oga faaKerisiano o a'oga e taula i le Tusi Paia, ma le faamoemoe e sui ai le tagata. E faapefea ona tupu nei suiga? O le tali: 'Ina ua a'oa'oina le tagata.' O le autu o lenei pepa e limata'ita'iina e fesili nei: E faapefea ona mautinoa o loo tupu le a'oa'oina, o le talileleia o se mataupu, ma le uluulu-a-matafolau o se a'oa'oga? E faapefea ona iloa o le a'oa'oina ua maua e tagata, e tusa ma le ituaiga a'oa'oina sa fuafuaina?



"Auā Tatou te Nonofa Pea ma e Matitiva": O se Su'esu'ega Faatatau i le Tagata po o le Tulaga Mativa. - Fatilua Fatilua

O le faamoemoe o le pepa e finauina ai se manatu o le tulaga mativa po o le tagata mativa o se tasi o faafitauli e tumau pea i le sosaiete ma e feagai pea ma tagata faatuatua.

RIPOTI KOLISI (A'OA'O & FALETUA)

E muamua pea ona sii le viiga ma le faafetai i le Atua, ona o lona alofa ma lona agalelei, ua ta'ita'i mai ai lo outou soifua ma so matou ola i le faaiuga o lenei kuata muamua o le tausaga. Ana le seanoa lona Agaga mafuta mai ia i tatou, e le mafai ona faataunuaina ma le manuia faamoemoe sa tatou feagai ai. Auā e ui lava i so tatou malosi ma se iloa, ae lagona pea le faatauva pe ana leai le auai mai o le Atua i la tatou folauga, o lea ua to'a ai nei i fanua lelei le faaiuga o lenei kuata, e ala i le taitaiga mana o lo tatou Atua.

A o se ripoti pu'upu'u lenei o le Mafutaga a A'oa'o ma Faletua mo le afa muamua o lenei tausaga. E silisili ese lava le alofa o le Atua i le mafutaga, ona e mai lava i le amataga o le tausaga seia oo mai i lenei masina, o loo manuia uma le lautele o le mafutaga. Sei vagana ai nisi taimi e aafia ai i ma'i o le tino, ona



saili togafiti lea i le falema'i, faatasi ai ma talosaga molia i le Atua mo lona mana faamalolo.

Sa molimauina le galulue malolosi o A'oa'o ae maise lava i latou faatoa ulufale mai. O se lu'itau tele i le Tausaga Muamua, ona o le tau faamasani i galuega, ae ui i lea, na manuia le faaiuga o lea vaiaso i le alofa o le Atua. E momoli atu le faafetai ma le faamalo i le vasega o Faaiuasaga ma o outou Faletua, Susuga i Lagolago ma le nofo-a-suega a le tatou nuu, ona o le lava papale ma le onosai i feau ma tiute feagai ai. E le galo le sao tāua o le Mafutaga a Faletua, i la outou pito laau tauave, sa sologa lelei ai

le faamoemoe o lenei vaitau. Manatu lava ua outou faia mea uma ina ia viia ai le Atua.

Lau Susuga i le Alii Pule ma le Faletua, le Sui Pule ma le saofaiga malu i Faiaoga ma Faletua. E momoli atu la matou faafetai tele e ala i la outou taitaiga, a o se alafua e lima taitaina ai so matou faatauva. Faafetai le titifaitama ma le faapalepale mai i so matou vaivai. O le a sa matou auaunaga ma se faatinoga ua sala, o outou o matua faitama, e magalo ai so matou lē atoatoa. Matou te lē agatonuina a outou Susuga i se faamatalaga, ae o le tatalo a le mafutaga, alofagia e le Atua lo outou soifua valaauina, auā le a'otauina o fanau a le Ekalesia. Agalelei le Atua i la tatou folauga o lenei tausaga, ta'ita'ina pea e ona aao alofa.

Pouoa To'a (Peresetene)

Melila Faasalafa (Failautusi)

TAALOGA A'OA'O MA FALETUA

O se tala 'oto'oto lenei o taaloga a le Kolisi Faafaifeau i Malua, talu mai le amataga o lenei tausaga. Mo A'oa'o, e tolu taaloga o loo faatinoina; o le soka, lakapi pa'i ma le kirikiti Samoa, a o Faletua i le volipolo. Ua vaevaeina A'oa'o i ni au taaalo se lua; o le au lanu pa'epa'e, ma le au lanu uliuli, ae tolu divisions – o le A, B, ma le C. O loo tau fai tutusa le malolosi o au ia e lua o le Pa'epa'e ma le Uliuli i le faaiuga o lenei kuata.

I le taaloga o le kirikiti Samoa, e fa au ua vaevaeina ai A'oa'o. O le lanu Mumu, lanu Meamata, lanu Moana, ma le lanu Samasama. E faasolo uma au e taaalo mo le talita, ae mo lenei taimi, o loo mau le talita i le au lanu Meamata.

I taaloga a Faletua o loo fai faataamilosaga ina ia saili ai le siamupini i le tele o manumalo. E pei ona vaevaeina A'oa'o mo le taamilosaga o le kirikiti, e faapena fo'i i Faletua mo le latou taaloga o le volipolo.

O le faamoemoe ma le mafuaaga o nei taaloga, ina ia tausi ai le soifua maloloina i le faamalosi tino i

Aso Tofi ta'itasi, a o se avanoa fo'i e mapu mai ai galuega ma a'oa'oga o loo feagai ai.

Komiti o Taaloga – Faiaoga: Brian Kolia ma Fatilua Fatilua; A'oa'o Faaiuasaga: Petaia Tuifao, Tapito Sanerivi, Ben Tuia, ma Sapati Sapati.



AOGA A LE FANAU

AOGA ASO SA

O le viiga i le Atua i lona alofa tausua ua tatou aulia mai ai lenei tausaga fou i le amatatia ai foi o tiute ma galuega a le Aoga Aso Sa a Malua, i lalo o le taitaiga a le Tamā Pule ia Vaitusi Nofoaiga ma le Faletua ia Mile. Sa faapea foi ona galulue faatasi ai ma Faletua o Faiaoga i vasega taitasi.

O le Vasega Amata sa galulue ai Faletua o Faiaoga ia Mile Nofoaiga, Pepe Sasa, Julie Tauaivale, ma Moevasa Reti, faatasi ma Faaiuso ma Faletua ia Ioane Sosene, Junior Saolotoga, Punalei Operu, Veronika Sose ma Sandra Sapati. E 59 tamaiti o lea vasega. O le Vasega Laiti sa tofia ai Faletua ia Fuarosa Maulolo, Tanaria Kolia, Vaituutuu Fatilua, faapea A'oa'o ia Patamo Soa, Junior Sanerivi, ma le Faletua ia Ranan Mauga. E 38 tamaiti o le Vasega Laiti. O le Vasega Feololo sa galulue ai Faletua ia Sina Wulf, Lemau Aperamo, ma Emelia Bentley, faapea A'oa'o ia Kereta Faatonu ma Mavaega Paulo. E 25 tamaiti o lea vasega. O le Vasega Matutua sa tofia i ai Faletua ia Malavai Moleli, Panorama Setu ma Jeddah Korja, faatasi ai ma A'oa'o ma Faletua ia Poao Laufiso, Olotauatia To'a, ma Fotuivasa Toma. E 21 tamaiti o lea vasega. Ma le Vasega Matutua Faapitoa sa galulue ai Faletua ia Angharad Saga ma Pauline Esera, faatasi ma A'oa'o ma Faletua ia Benjamin Tuia, ma Rehiw Sanerivi. E 19 tamaiti o lea vasega faapitoa. O le aotelega, e 31 Faiaoga Aso Sa sa galulue ma tamaiti e 155 o le Aoga Aso Sa a Malua mo le kuata muamua.

Sa faatinoina foi nisi o aso faamanatu faapitoa mo le Au Kerisiano, e pei o le Aso Sa o le Laupama sa faia ai le solo a le fanau ma latou Laupama mai le Fale Mafutaga agai i le malumalu tapuai a le Kolisi. O le polokalame mo le Eseta sa faatinoina ai e le vasega Faaiuso se tala ma pesepesega mo lea faamoemoe i le afiafi o le Aso Lua, 15 Aperila, 2025, ma faaiuina ai galuega mo lenei kuata i le Aso Sa, 27 Me, 2025.

E momoli ai le faafetai tele i le Susuga i le Tamā Pule mo lenei avanoa e galulue ai o Faiaoga Aso Sa mo lenei kuata muamua o le tausaga. Ia faamanuia le Atua.

Faafetai, Junior Sanerivi.



AOGA AMATA

Na amatatia a'oa'oga a le Aoga Amata a Maluapapa i le aso 17, Fepuari, 2025. O le aofai o tamaiti a'oga e 28, 12 teine ae 16 tama. O a'oa'oga ma alafua o loo faaogaina, o le Taiala lava mai le Matagaluega o Aoga i lalo o polokalame a Aoga Amata a Samoa.

O mataupu amata o lenei tausaga ua faaulutalaina faapea, *O Tagata ma le Siosiomaga*. O po o Aso Sa e faatino ai aoga a Faletua o A'oa'o auā tapenaga mo le a'oa'oina lelei o fanau i vaiaso taitasi. O totonu lava o nei

mataupu autu, o loo aofia ai foi ma le a'oa'oina o fanau i le itu faaleagaga e ala i lotu, tatalo, pese, ma tauloto tau le Tusi Paia. Sa faatinoina foi le polokalame o le Eseta. O le tala o le Eseta sa faatinoina e Faletua o A'oa'o, ae faapea foi le fanau. O le latou Easter Egg Hunt ma a latou taaloga na faauma ai galuega o le kuata muamua.

E saga faafetaia ai pea lo tatou Atua, ona o lona alofa ma lona agalelei ua faaiuina ai ma le manuia polokalame sa feagai ma le Aoga Amata i le amataga o le

nei tausaga. Ia manuia tele le faaauauina pea o le faamanatuina o le 150 tausaga o le Fono Tele a le EFKS.

Ma le faaaloalo tele,
Mile Nofoaiga.



AOGA AMATA - ATA



MOTU LE PA

USUFONO KOLISI



Ua filifilia le Susuga i le Faifeau Fomai Faiaoga ia Brian Kolia e avea ma Sui Usufono a le Kolisi Faafaifeau mo lenei tausaga (2025). O le Aso Gafua, 19 Me, na folasia ai e Kolia le pepa mo le Fono Tele ua faaulutalaina, “*O Le Ekalesia ma le Nu'u Folafolaina: Foaiina mai e fai ma outou.*”

I le mae'a ai o lana folasaga, sa faalauiloa aloaia ai foi e Kolia lana tusi, “*Carrying Qoheleth's Maota (House): An Australian-Samoan Diasporic*

Reading.” O lenei galuega sa lomia i le tausaga e 2024 e le Society of Biblical Literature, e faaautu i Amerika. Na faaleoina le agaga faafetai o Kolia i le Taitaifono, le Laulauafono o le Fono Tele ma le Mamalu i le Usugafono o le 2025, faapea le tapuaiga a Tamā o le Ekalesia, le Kolisi Faafaifeau, ma ona Ekalesia (EFKS Campbelltown & EFKS Wainiuomata), faapea si ona Faletua ma si o la alo ona o le tapuaiga a o alo faiva mo lea faamoemoe.

Malō le finau, faafetai le faaeaea, ia viia le Atua. O faamanuiaga mai le Susuga i le Alii Pule ia Nofoaiga ma le Faletua ia Mile, faapea le aiga Faiaoga ma Faletua ma le Kolisi Faafaifeau, a o feagai ai ma le usugafono o lenei tausaga.

ASO SA O TINĀ

E tulaga ese lenei tausaga i le Aso Sa o Tinā i Maluapapa nei, ina ua mafuta mai nisi o Tinā ma Faletua o Faafeagaiga ma Toeaina o le Ekalesia, auā le usuia o le Fono Tele, 2025. Na taitaia e le Susuga ia Alesana Palaamo le sauniga o lea Aso Sa tāua, ona saunoa lea o le Tamā Pule e faafeiloa'i ma faafetaia le mamalu o le Ekalesia ua mafuta mai i lenei Aso Sa o Tinā, ae maise foi mo talosaga ma tapuaiga o loo manuia ai pea le Kolisi. Na saunia e Susuga i Faiaoga, A'oa'o ma Faletua o le Faamuli nai meaalofo mo Tinā o le Kolisi ma le aulotu, faapea foi Tinā o le Ekalesia na auai mai i lea Aso Sa.



MOTU LE PA (CONT'D)**FAAIPOIPOGA**

O le aso 21 Tesema 2024, na faaiipoipo atu ai le Susuga i le Faifeau Faiaoga Fomai o Malutafa Faalili i le tamaita'i o Perenita Vaasili mai le alalafaga o Lalomalava ma Sapapalii. Na auai atu i ai le Susuga i le Sui Pule o le Kolisi, Susuga i le Faifeau Faiaoga Fomai ia Arthur Wulf e fai ma sui o le Kolisi. Manuia tele le aiga fou.



E to'alua A'oa'o o le Kolisi na faaiipoipo ia Tesema 2024, ma Ianuari 2025. O le Susuga i le Faaiuasos ia Maligi Setefano ua faaiipoipo atu ia Momoi Faleava; faapea le Susuga ia Junior Saolotoga ua faaiipoipo atu ia

Meressapinni Pupualii. Sa auai atu i ai le Kolisi ma togisao i ia aso fiasia, e ala i pese o sauniga lotu faapea foi faafiafiaga matagofie. Sa talia ma le loto faafetai e le Kolisi meaalofo ma faaaloaloga a aiga-na-lua mai ia faaiipoipo uma. Ia manuia aiga fou i le agalelei o le Atua.

**SIKOLASIPI (SAMOA MA ATUNUU I FAFO)**

E to'atasi le A'oa'o i'u mai Malua ua faamanuiaina i le sikolasipi a le Ekalesia mo lenei tausaga i le faailoga mauuluga o le Master of Theology (one year course). O le Susuga ia Spencer Leuta ma le Faletua ia Faafou ua filifilia e le Komiti o Malua e faaauau lona taumafai i lalo o le Matagaluega a le Feagaiga Tuai. E toalua ai nei sikolasipi a le Ekalesia mo lenei lava polokalame, i le Susuga ia Matelili Tautalagia ma le Faletua ia Toese na amata mai le tausaga 2024 (two year course), ma o loo faamoemoe i la'ua uma e faau'u i le tausaga nei. O loo alaala lava Susuga i A'oa'o sikolasipi ma o la Faletua ma fanau i totonu o le Kolisi.

A o gasolo ai feau ma galuega faalea'oa'oga a le Kolisi i lea tausaga ma lea tausaga, e lē o tuua ai lava le auai mai o sui mai isi Ekalesia o le Pasefika, e a'otauina i totonu o le laumua i Malua. Mo lenei tausaga, o loo faaauau ai le taumafai o A'oa'o ma o latou Faletua mai le Ekalesia Faapotopotoga

Kerisiano Tokelau ma le Ekalesia Kerisiano Tuvalu, i vasega o le Tausaga Lua, Tolu, ma le vasega Faaiuasos.

E toalua foi Faifeau mai le Kiribati Uniting Church o loo faaauauina le soifua saili i le faailoga mauuluga o le Master of Theology, ina ua faamanuiaina i faailoga o le Bachelor of Divinity i le tausaga ua tuanai mai le Kolisi i Malua. O le tausaga muamua foi lenei ua auai mai ai Faifeau ma A'oa'o fou e toatolu mai Tuvalu, o loo a'otauina mo le faailoga mauuluga o le Master of Theology. Ia faamanuia le Atua i le soifua taumafai, faapea le tapuaiga a Ekalesia ma aiga.

Susuga Sikolasipi EFKS**Susuga Sikolasipi Tuvalu****Susuga Sikolasipi Kiribati**

MEALOFA LIONA - MELEPONE



O le Aso Toonai, 26 Aperila 2025, na malaga mai ai sui o le Lions Club, Sunshine Victoria, e momoli aloaia mai meaalofo mo le Kolisi ma lana Aoga Amata. O le Lions (Rotary) Club, o se faalapopotoga o loo faatinoina auaunaga mo tagata, aoga, ma sosaiete eseese o le lalolagi, ae maise mo i latou o loo i ai ni manaoga faapitoa. O nisi o meaalofo sa tauaao i ai le Lions Club, e aofia ai filing cabinets, o first aid kits, o lavalava ma seevae mo tamaiti, atoa ai ma laptops ma projectors e faaaoaga e le Kolisi i ana galuega faatino. Sa saunoa le Susuga i le Alii Pule, Faifeau Polofesa ia Vaitusi Nofoaiga, e fai ma sui o le Kolisi, i le agaga faafetai ona o le agalelei o lea faalapopotoga, ae maise o le faiga-paaga faaauau pea a le Kolisi ma le Lions Club i Sunshine. O le tatalo a le Alii Pule ma le Kolisi, ia saga faatamaoaigna pea e le Atua le Lions Club i Sunshine, aua le faatinoina o lea auaunaga tāua mo le sosaiete ma le lalolagi.

AT HOME

O lagona o le fiafia ma le faafetai na fa'atumulia ai le fale o le Mafutaga a Tina i le siva fa'a-le-aiga (*At-Home Dance*), e lūlū ai le aveō mai polokalame amata o lenei tausaga a le Kolisi e pei ona masani ai. Na matauina le to'atele o tama'itai vala'aulia na 'auāi mai e molimauina lea faamoemoe. Na vaaia foi le sisiva fiafia o A'oa'o ma o latou Faletua, faapea foi nai fanau i le manaia o le faili a le Pacific Love. O le A'oa'o Faaiuso ia Viliamu Viliamu na ta'ita'i i le tapua'iga amata ae faaiu i le saunoaga faafetai a le Susuga i le Alii Pule ma fa'ama'ea aloa'ia le vaiaso fa'amasani (*orientation week*) a le Kolisi.



ASO MALIU & TOETU

E tumau lava le agaga faafouina ma le loto faafetai i le matagofie o le Tala o le Faaolataga ia Iesu Keriso. E tumau ai pea le viiga i le Atua ina ua mafai ona faataunuuna le polokalame o le Aso Maliau ma le Toe Soifua mai o lo tatou Alii Faaola e ala i le tala ma pese, faatasi ai ma siva faa-evagelia sa faatinoina e le Vasega Faaiuso i le Aso Lua, 15 Aperila, 2025. O lenei polokalame sa taitaia lava e le Susuga i le Alii Pule, le Faifeau Polofesa ia Vaitusi Nofoaiga e ala i se sauniga, ma sa pueina ma faasalalauina i luga o le ala-ata a le EFKSTV, le TV2.



FAAMULI TAUSAGA 1

E pei ona masani ai i tausaga taitasi, o A'oa'o ma Faletua o le Tausaga Muamua e feagai ma le faamuli o le Eseta ma le Toetu. O se taimi e faamasani ai faapea le galulue faatasi i feau ma galuega, a o le malu puipuia foi o meatotino, maota ma vaega eseese o le Kolisi, i lalo o le taitaiga a le Susuga i le Tamā Pule ma Susuga i Faiaoga ia Hobert Sasa ma Faafetai Korina ma o latou Faletua.

O le Tausaga Muamua e toa lua sefulu tolu (23) A'oa'o ma Faletua e toa sefulu tolu (13), mai Samoa nei, Niu Sila ma Ausetalia, faatasi ai ma fanau. Ua filifilia ai Susuga i A'oa'o ia Aleni Uelese (Taitaifono), Gasolo Salima (Failautusi) ma o la Faletua e fai ma taitai o lenei vasega. O i laua foi ia sa fesoasoani i le sauniga lotu o le Toetu i le tautuina o le faamanatuga. Sa tapenaina foi se toonai i lea Aso Sa mo le Tamā Pule, Sui Pule ma Faiaoga ma o latou Faletua, faapea Faifeau ma A'oa'o sikolasipi, faatasi ai ma nai meaalofa e faamanatu ai le toe soifua mai o lo tatou Faaola.

E momoli ai le faafetai tele i le Tamā Pule ia Vaitusi Nofoaiga ma le Faletua ia Mile, faapea le Sui Pule ma Faiaoga o le Kolisi ma o latou Faletua i le faatuatuga na tuuina mai matou te faatinoina ai tiute faa-faamuli o lenei tausaga. Faafetai le faasoā, malo le timai faa-tamā. Faafetai foi i matua ma aiga sa fesoasoani malosi i le faatinoina o lenei faamuli.

Ia faamanuia le Atua.

Faafetai, Faamuli Tausaga Muamua.



MAOTA FOU MA MAOTA FAAFOUINA

O le tausaga nei sa toe fa'aleleia ma faafouina ai nisi o maota o Pulega i totonu o le Kolisi. E aofia ai le Pulega a Apia i Sisifo, Aiga-i-le-Tai, ma Manukau i Sasa'e/Waikato. O le faamoemoe o ia Pulega ia saunia lelei maota mo le Fono Tele i lenei tausaga, 2025, ae maise o le fa'amanatuina o le 150 tausaga o le Fono Tele a le Ekalesia. O le Susuga i le Alii Pule o le Kolisi, le Faifeau Polofesa ia Vaitusi Nofoaiga na vala'aulia fa'apitoa e taita'ia sauniga Lotu na tatala aloa'ia ai nei galuega tāua. Ia saga viia ai pea le Atua i nei galuega lelei, ma ia faamanuia le Atua i le soifua galulue ma le ola faitaulaga o ona tagata e faia ai mea silisili mo le Atua ma Lana Talalelei. Ia faamanuia le Atua i Susuga i Toeaina ma o latou Faletua, faapea le paia o Pulega taitasi, ma ia avea nei maota e fai ma viiga o le Atua. Malō le galulue.



Pulega Manukau i
Sasa'e/ Waikato



Pulega Aiga-i-le-Tai



Pulega Apia i Sisifo

FAAMAVEGA - CLARKE STOWERS MA LE AIGA

O le tausaga nei ua faamanuiaina ai ma taliaina foi e le Komiti o Malua le Susuga i le Faife'au Faia'oga ia Clarke Stowers, mo le faalateleina o le silafia i iunivesete i atunuu mamao. O le aso 6 o Mati na faataunuu ai se aiga fiafia (*fellowship meal*) a le Kolisi e fa'amavae atu ai le Susuga i le Alii Pule ma le Faletua, faapea le Kolisi i le Susuga ia Stowers ma le Faletua ia Fofogaolevai ma le fanau. Ua sauni i latou e malaga atu mo Niu Sila mo le fa'aauauina o le taumafai i le fa'ailoga taualoa o le Fomai o le Tofa Manino (PhD) i totonu o le Iunivesete o Aukilani, Niu Sila.

O le Susuga ia Stowers o le tasi o faiaoga o le Matagaluega o le Tala Fa'asolopito o le Ekalesia ua faamanuiaina mo lea faamoemoe mo le lumanai manuia o le Kolisi. O le isi sui o loo faauau le a'otauina i le Iunivesete o Vitoria, Ueligitone, Niu Sila, o le Susuga ia Tutoatasi Toalima. O le faamoemoe lava o le fa'alauteleina pea o tomai ma agavaa o Faia'oga o le Kolisi ina ia tumau pea le maualuga o le tulaga o le a'oa'oina o fanau talosia a le Ekalesia o loo a'otauina i lana Kolisi Faafaifeau.

Ia faatasi le Atua i le faamoemoe, ma faalagolago i Lana taitaiga e manuia ai. Alofaaga ma faamanuiaga mai le Kolisi.




LIBRARY PROGRESS



E ui i le lē ausia o le faamoemoe sa moe miti ai, ina ia faapa'iaina le Faletusi fou o le Kolisi e fai ma ma'a faamanatu o le faailogaina o le 150 tausaga o le Fono Tele a le Ekalesia, a o lenei lava ua tino mai le tele o galuega o le faletusi fou loo fausiaina nei. I le silasila ma le matau, ua tele ina maea le mamafa o galuega, ma o loo faagasolo pea vaega mulimuli o le galuega, e pei o vali muamua i fafo ma totonu; ma ua amata foi galuega i le faalo ma galuega tau eletise mo le fale atoa. O nisi o galuega faapitoa e pei o faamalama o loo talia pea mai atunuu mamao, ma le faamoemoe e faapipiina i le maea ai o le Fono Tele.

O fuafuaga a le Komiti faatonutonu o loo nafa ma le galuega ina ia faama'ea'ea lelei vaega uma o le galuega, nai lo le faatopetope ae ono alia'e mai ai ni faafitauli ogaoga i le lumanai, e pei o nisi o galuega tetele faapenei ua amata ona faaletonu ma faaleagaina i totonu o le atunuu. E talitonu le taofi e maea lava lenei galuega tele i se taimi lata mai o lenei tausaga.

O le tatalo i le Atua ina ia sao ma uli lenei galuega tele ma ia saogalemu pea le aufaigaluega i le alofa tausi o le Atua. E momoli atu ai le faafetai tele i le tapuaiga ma le lagolago a le Ekalesia i galuega eseeese mo le lumanai manuia o le Kolisi. Faafetai tele ma ia faamanuia le Atua.



ATINA'E MA VAAIGA ESEESE I LE KOLISI



FALEOLOA A LE KOLISI

O lenei Fono Tele, o se tausaga tāua tele mo le Ekalesia Aoa faapea le Kolisi i Malua, ona ua atoa ai le 150 tausaga o le Fono Tele. Ua faapea foi ona sagisagi fiafia ai sui o le Faleoloa a le Kolisi, i le faatinoina o lana tautua masani, auā le mamalu o Sui Usufono faapea le Ekalesia ua autovaa mai. E pei ona masani ai i tausaga taitasi, e tatala le faleoloa i le 4:00 i le vaveao seia aulia le 11:00 i le po, ae e tapunia i le taeao ma le afiafi i taimi o faigalotu. E ui i le itiiti o lenei Faleoloa, ae o loo mafai lava ona tali atu i manaoga o tagata faatau, ae maise ai le faamāmā avega o tau o ana oloa. O loo vaaia lava le Faleoloa e le Susuga i le Faifeau Faiaoga ia Esera Esera, faatasi ai ma le fesoasoani malosi a Susuga i A'oa'o mai tausaga taitasi. E avea

ai lenei avanoa e momoli atu ai le faamalo ma faafetai i le paia ma le mamalu o le Ekalesia, ona o la outou lagolago faifaipea i tausaga taitasi i le Faleoloa a le Kolisi. Manuia tele le 150 tausaga o le Fono Tele.





*Ia manuia tele le faamanatuina o le 150 tausaga o le Fono Tele.
Alofaaga mai le Alii Pule ma lau Kolisi Taafaifeau.*

Vaitusi Nofoaiga, Visesio Saga, Alesana Palaamo, Reupena Maulolo, Brian Kolia, Fatilua Fatilua, Leuelu Setu, Esera Esera, Mariota Seiuli, Tafatolu Bentley, Tafatolu Tapaleao, Faafetai Korua, Hobert Sasa, Fraser Tauaivale, Saleaula Reti, Andrew Fui, Raisedinland Iose.
Malua Theological College
www.malua.edu.ws © 2025

